

春夜宴諸從弟桃花園序

李白

夫天地者，萬物之逆旅也；光陰者，百代之過客也。而浮生若夢，為歡幾何？古人秉燭夜游，良有以也。況陽春加我以煙景，大塊假我以文章。會桃花之芳園，序天倫之樂事！群季俊秀，皆為惠連。吾人詠歌，獨慚康樂。幽賞未已，高談轉清。開瓊筵以坐花，飛羽觴而醉月，不有詠，何伸雅懷？如詩不成，罰依金谷酒數。